

A Babbu, Antoni Montesu

Airadu ti at fertu ogni dolore  
istadu ses'in abbas tempestosas  
t' ana puntu ispinas velenosas  
senz'aer de fortuna su favore.

Prantu as in oras sambenosas  
a s'odiu as rispostu chin s' amore  
mai immentricadu as su sudore  
c'ass'assutadu chin manos callosas

lassadu as s'ammentu sinceru  
de su trattare onestu privu e male  
rispettosu in tottu pro s'anzenu

Canno ses mortu ses mortu serenu  
lassanne e onestade su sinzale  
a sos chi t'ana juttu in coro abberu

Peppe Montesu

A bois lizeras affido

A bois custu dolore  
lizeras aes afido  
sas penas mias cunfido  
si m'achides su favore

vois bolenne in altura  
a Nina mi salude  
a issa li racontade  
tottu sa mia amargura

Sa oche sua ascurtade  
nadelu cantu l' adoro  
sas bramas de custu coro  
aes de chelu picade

Da cuss'aera cullide  
Su profumu e su lentore  
Sos alenos de amore  
a mie totu vatide

si in cussos chelos volade  
umbe vivet Nina mia  
cun garbu e cortesia  
unu saludu li dade

Aes ch'intrades totue  
Colade umb'est Nina mia  
A issa nadelu ebbia  
Chi prestu torrar'ap' a cue

Peppe Montesu  
Sant'Andria 2014

## Faeddademi

A bos mirare mi ponides dolu  
nurras e predas chi azes serradu  
de sa sardigna su tempus passadu  
de un'ammentu chi non leat bolu.  
intro e mente sezis vois solu  
pro ischire su ch'it umbe so nadu  
predas chi mai su tempus at rutu  
dade risposta a custu coro assutu.

Faeddademi vois predas mias  
nademi sos secretos sugellados  
nade de cuddos chelos isteddados  
chi bos ana basadu tantas vias  
cale barbaros cantos de istrias  
bos'an cuvadu a sos coros amados  
nade bois su modu e sa manera  
pro nos torrare cudda istima vera.

Nade de babbos contade de mamas  
su c'azes bidu a nois naride  
memorias arcanas aperide  
dadennos de s'istoria sa trama  
galu nos brujat sa puntida lama  
de su segretu chi bois juchides  
naze chie chin bois at dormidu  
de s'ammentu chi azes sepellidu.

Peppe Montesu  
Martu 2016

## A Mama malaida de Alzheimer

I denne a mama, in coro so affrantu  
e a sos ojos, umida mi enit,  
un'unda lacrimosa, chi mi ferit  
che chi mi picchene a su campusantu

Non conoschet'issa risu ne piantu  
ne sa janna festosa pius m' aperit  
non s'arzat no s'abbassat ne si sedit  
sa mente li est neghenne d'ogni ispantu.

Non si ammentat ne mese ne annu  
piussu no mi muttis e mi gridas  
ne cunfortu mi da intro s' affannu

No mi sanas pius cuddas feridas  
cun paraulas che meigosu pannu  
no mi conosches e pius no m'ischidas

Peppe Montesu  
Nugoro, 26 Capidanne 2012

A Margherita

Ohi cantos amaros pensamientos  
Novellas ltuosas mi ponides  
De disiperu sa janna aperides  
A sa mente mi lompen sos turmentos  
Torràn a mie alligros mumentos  
Morte totu ti leas su chi vides  
Deus leala tue in brazos tuos  
De paghe eterna dali so azuos

Peppe Montesu  
Capidanne 2016

Canta poeta

Canta canta poeta nessi tue  
Cun rima dulches e armonicu cantu  
Balsamu dae a onzi coro affrantu  
rimas d'amore ispaghe in tottue  
de poesia piena ogni nue  
lava s'affannu allughe s'ispantu  
torra a sos coros bellessa e ispera  
cancella fumos c'annuan s'aera.

Infunne a versos lacanas e muros,  
de onzi anima istracca e affannada  
finat deretta sa longa nozzada.  
sa lughe mostra a sos coros iscuros  
vivat sa zente in locos sicuros  
finan sos dolos e s'intragna odiada  
solu sa paghe s'ispannet in terra  
muda ogni arma finat onzi gherra.

Assutta de sas mamas sos piantos  
e de giovanos su dolente istadu  
venzat traballu a su disoccupadu  
s'intennat solu risittos e cantos  
sas limbis malas dian solu vantos  
ognunu vivat chin su coro amadu  
illuminet su mundu s'aurora  
canta tue poeta canta ancora.

Peppe Montesu  
Trigulas 2014

Muttos dae sa cella... ammentanne a babbu arrestadu innocente

Unu fogliu e cartollaru  
iscrittu a manu mia  
appo postu in d'una busta  
unu fogliu e cartollaru  
vida crudele mes custa  
so patinne solu ebbia  
vivere goi m'est amaru.

Custa semplice littera  
est s'unicu meu volu  
chi ispiccare potto inoghe  
custa semplice littera  
iscritto ca chene voghe  
inserradu senza dolu  
mi an in custa galera.

Uu girone infernale  
da altos muros recintu  
da cainos survegliadu  
unu girone infernale  
coro meu custu istadu  
donzi ardore mi at vintu  
s'amore est sutta su male.

Da custa cella serrada  
umida e angustiosa  
iscura bassa e astrinta  
da custa cella serrada  
de risu mancu sa vinta  
su piantu no est cosa  
so che anima dannada.

Fnidas sas serenadas  
sos momentos senza dolos  
cudda alligra cumpagnia  
finidas sas serenadas  
mai creder lu podia  
de non biere piu bolos  
de rundines appena pinnadas

A un innocente serradu  
mancata alenu e respiru  
crudele est cussu patire  
a un innocente serradu  
coro non podes ichire  
de mente mea su giru  
ammentenne su passadu.

Cussa mirada odiosa  
senza dolu priva e affannu  
ti che leat su respiru  
cussa mirada odiosa  
che busilada su tiru  
mi ucchidete senza dannu  
vivu mi ponen in losa.

Sa terra paret bagnada  
de sambene e de piantu  
non bat rosas ne fiore  
sa terra paret bagnada  
solu affannu e dolores  
peus de su campusantu  
senza rucche piantada.

Privu de cunfortu umanu  
notte e die isto pensenne  
a su chi mi an causadu  
privu de cunfortu umanu  
s'amore c'appo lassadu  
chisciai s'est assettenne  
ohi si l'erepo in manu.

Amore iscrio su fogliu  
de dolore e de affannu  
pro chi siat cunsegnadu  
amore iscrio su fogliu  
de su ch' este capitadu  
fruttu d'unu vile ingannu  
bastardu e tottu un'imbrogliu.

Peppe Montesu

## Penas d'Amore

Pro te so dellerienne  
A d'onz'ora notte e die  
S'amore chi appo a tie  
De penas mest trafizenne

1

Una risposta sincera  
Dami coro istann' attenta  
Si tue ne ses cuntenta  
Sa dimanna cunsidera  
Faghe a modu e manera  
No mi lasses sambenenne

2

Cust'umile dimanna mea  
Picca chin seriedade  
Coro pro caridade  
No mi lasses in pelea  
Ispinosa est sa cradea  
Umbe mi ses mantenenne

3

Su coro meu as ligadu  
Las ligadu e bene pressu  
Custu istadu est unu pesu  
Chi lu mantenet latthadu  
Unu sinzu coro amadu  
Mannami lestru currenne

4

Custa cadena amorosa  
Astringhe o secca in tottue  
Canzellache cussa nue  
Ca pro me est troppu umbrosa  
Cussa risposta donosa  
Dae te so assettenne

5

Si su coro as impignadu  
Naramilu su matessi  
Mancari de prantu nessi  
App'a esser succuttadu  
Sos ojos chi t'an sognadu  
Issolver si den pranghenne

6

Ma si tue amas a mie  
De lughe t'ana abbagliare

Su coro t'atta a cantare  
Serenedas note e die  
Tottu ana ischire chie  
Sa mente mest azzenne

Peppe Montesu

A Gaetanu Mura velista de Durgale

Sa vela sarda de nou in su mare  
Gaetanu cun tecus post'at alas  
De sas abbas salidas undas malas  
Chin Italia bas a isfidare

Dae Gonone chi as che altare  
Puntas sa prua non miras in palas  
De mares undas chi non faghen galas  
Iras issoro vas a afrontare

Sa sarda balentia intrea tue  
Mustras chin sas impresas pius veras  
Annanne in solitariu totue

De s'oceanu afrontas buferas  
Jeo so sardu non de aterue  
Narenne chin aturas e isperas

Peppe Montesu  
Lampadas 2017

A mie naro lassa su cantare

M'isto narenne lassa su cantare  
Ammuda cussos piulos de coro  
Non istes fatu a sonos issoro  
Mih chi sun penas lassalos istare  
Non sicas goi a los moricare  
Serralos cue faghenne tesoro  
Mantenetilos in cue serrados  
Non los boches de goi ifaghinados

Ifaghinare bios e lamentos  
De dulu poden esser solu bena  
Nudda l'importat a sa zente anzena  
De sos tuos afannos e turmentos  
Cheren intenner solu sos cuntentos  
De poesias chin sa rima amena  
Sas penas tuas de mente e de coro  
Lis ammentat dolente sas issoro

Ma jeo canto su chin coro acato  
E cussu ap'acatadu e cussu canto  
Solu chin rima e sa dassa l'ammanto  
Cuss'apo in coro meu cussu abato  
S'a disizos de ateros m'adato  
Mala est s'aina e non mi ne vanto  
Duncas si mi cherides ascurtare  
Solu lamentos bos poto cantare

Amaru rezelu

Su munnu a su rovesciu

Prima su mascr'e femina it cuvadu

Com'est de moda ed est unu vantu

Mustrat su culu pro ponner'ispantu

Si li nas cosa venis accusadu

Ti nan fascista e ses cundannadu

Animas in pena

Vagan perdidas in sardas aeras  
Animas in isetu e libertade  
Sun a sos bios narenne ischidade  
Senna in sa morte semus prejoneras  
Sos sognos de riscatu e d'isperas  
Feridos sunu totu abaidade  
Sezis a therachiu destinados  
In mesu a su mare abbandonados

Chircan in note luna sas pasturas  
Chircan cuviles lahores armentos  
Ma sos fochiles sunu totu ispentos  
Rutos sun totu muros e crejuras  
Sas abbas cristallinas sun'iscuras  
Italicos sos sonos de sos ventos  
Su sardu sonu morinne a lamentu  
In sas laras de totu s'est ispentu

Chircanne meres istan e padronu  
Sos ch'ana abandonadu donzi'ispera  
De libertade prus arta e fiera  
E de rebelle non an pius su tonu  
Nudda los moghet ne lampu ne tronu  
Paret sa libertade una chimera  
Totu dormidos in torpore eternu  
De libertade chene esser pernu

Non b'at piu anelu e zustu airu  
Sa libertade non arzat padera  
Sos sognos diventados sun chimera  
Semus in bentu che fozu e papiru  
De su sardu no amus prus ammiru  
Canzelladu che amus donzi ispera  
Semus annanne chene ischire a ue  
A matha a terra semper rue rue

## Ammentu de Babbu

Istracu ti sedias in s'istrada  
Cun sa fronte piena de sudore  
Sa veste ammodicada de lentore  
De belluju vezonza e consumada  
Sa barba longa , sa cara afumada  
Chin duos ojos de raru bagliore  
Parias chi tenias inserradu  
S'amment'arcanu de tempus coladu

las manos isfatas e callosas  
A donzi sacrificu abituadas  
Fortes dezisas de fertas sinzadas  
Ma chin mecus continu carignosas  
De carbone nieddas iscurosas  
las sa carre e anima marcadas  
In locu modde mai ti sedias  
S'eres potidu totu mi daias

s'ascultu a su faeddu preferias  
Cann'aeddavas in ojos miravas  
Semper chito a bon'ora ti pessavas  
Mai disturbu a s'ateru daias  
Parte de de totu a totu fachias  
Si ti mutian a totue annavas  
Chin totu fis amicu e fis d'azudu  
Mai de nudda as apid'impudu

Non ti mostravas e totu fachias  
Lodes non ne cherias e ne vantos  
Non t'atristavas ne ias ispantos  
Sa persones a fatos las medias  
De issenzia it pacu su ch'ischias  
Mai de cussu t'achias ammantos  
Sa paragula tua fit che oro  
Is de contegnu e mannu decoro

Barantachimbe ischiglias an sonadu

Annos barantaduos ch'at coladu  
Ma a bolu bi torro chin s'ammentu  
Forzis su tempus volad'est che bentu  
E zeo ifatu a isse so annadu

Ma in secus torranne sa mirada  
Nuscus intendo de dies passadas  
de cosas bellas chi sun'imbezadas  
d'ateras mortas chi no an torrada

tanno s fimos pienos de ispera  
Su coro aimus prenu de cuntentu  
Manifestu it su tou sentimentu  
Pro me fis tue sa lughe e lumera

A s'amore azuntu s'est rispetu  
Antela diventada ses d'importu  
In oras malas de nave fis portu  
De azudu a s'ispera e a s'isetu

Totu m'as dadu galu mi ses denne  
Pacu mi paret su chi ti do jeo  
cantas vortas mi pedo e non bi creo  
si totu custu lu so meritenne

Mastra d'amore pro me ses istada  
Donzi die che umile formica  
Ponenne a banna donzi cosa sica  
E infriscanne sa cosa imbezada

Carchi vorta chin s'uju umidadu  
Ti vio in sas lontanias camineras  
Canno su briu de sas primaveras  
Aias in podere e in istadu

Tanno fis bella d'ammaju e incantu  
Ma cussa fit bellesa e Hermosura  
Ma sa ch'as tue de coro bellura  
Est pius bella pius dat ispantu

A bortas penso si non b'is istada  
Ite erep'atu it'erep'istadu  
Forzis incoltu campu abandonadu  
Chi aradu non biet ne arvada

Sa vida imbezates tu a as pienadu  
De caminos de seda delicados  
De sinzillos de bida profumados  
Chi donzi bicu e coro an occupadu

Una famiglia amus allevadu  
Orgogliu nostru continu costante  
Semper de coro meu ses amante

Semper de te so innamoradu

## Canta pastore

Sas craes de coro

Dami sa craes de coro  
sos bios faghe cessare  
jeo a tie cherj' amare  
acumentami t'imploro

in petus torrami briu  
faghe su dolu finire  
prestu fachemilu ischire  
so che mortu senne biu

sa notte no b'at reposu  
isto in continu pensare  
s'aurora ido arrivare  
atristidu e lagimosu

custas penas de amore  
mi son vivu cunsumenne  
su tempus ido passenne  
ma non cessat su dolore

non cessat sighit continu  
e punghet sempere a cue  
costante finzas chi tue  
no li mustras su caminu

Una brazada de linna

Chin sa mirada mi pares narenne  
De sa richesa chi t' an regaladu  
De su nudda chi a tie est tocadu  
Tottu mi leo non bonne so denne  
Lu ap'a in manu lu sezis videnne  
Su bene totu ch'a mie azes dadu  
Una fasche de linna accapidada  
Pro unu sero de alluminzada

Peppe Montesu  
Jannarju 2017

## Su prantu dolente

A totu canno arrivat dat dolore  
Dolet abberu s'innocente morte  
Si assazamus sa d'ateros sorte  
Pedimus cuddu mai dadu amore  
Ischimus cantu dolet su brujore  
E cantu pungat in su coro forte  
In custas oras nois non vidimus  
Su ch'amus fatu e galu faghimus

Sa morte est in totue dolorosa  
venit non mirat ne locu o zenia  
Chie la rezit intro s'agonia  
Paret rezinne cosa afetuosa  
Chie morit in brama isperanzosa  
Paret chi vincat onzi tirannia  
B'at chie pranghet e chie l'adorat  
issa totue a luttu colorat

Canno in vida currimus cuntentos  
Pensanne chi sa morte mai arrivat  
In su momentu chi s'alenu brivat  
Ischidat sos dormidos sentimentos  
sos brios cessan si firman sos ventos  
A sonnu eternu nos dormit e ligat  
Est unu mantu nieddu oscurosu  
Ch'in coro times e non ti dat gosu

Sa morte est un pasu in s'anzianu  
Intro e issa chircat su reposu  
Paret suta su mantu lutosu  
Siat sa paghe ch'at chircadu invanu  
Ma at de vida un'istintu arcanu  
Chi lu mantenet su terrenu gosu  
Ma no est gosu e solu patire  
Sas fertas de su tempus in finire

Peppe Montesu  
Santu Gavine 2016

## Contade

Contade rios contade funtanas  
Gigantes nuraghes e tumbas contade  
Totu su ch'azes bidu bois nade  
De sinzos e d'istorias luntanas  
A sas famidas mentes novas ganas  
Chin su ch'ischides bois lis cazade  
In sa limba e sos babbos su faeddu  
Contade bois a mannu e piseddu

Cantade de Sardigna sa bellura  
Infusta dae lagimas dolentes  
De sos sorrisos firmados in dentes  
E de sa zente sua ogni tristura  
Contade e lassade onzi paura  
De fijos suos aperide mentes  
S'ammentu issoro lis ana negadu  
Pro lu lassare in olvidu cuvadu

Contade sos disizos abramidos  
Chene reposu chi sunu zirenne  
Vois contade ca sezis bidenne  
Sos ojos de piantos umididos  
Sos oriolos mustrate feridos  
D'Eleonora canno fit sognenne  
Canno sos sardos cheriat unire  
Pro no istare ifatu a pedire

Contade de sas carres cunsumidas  
Istrazadas a fune in sa piazas  
de su samben sas caras e carazas  
e de carres sicadas e feridas  
de famelicas belvas assedidas  
de ispigas messadas e de pazas  
contade totu non lassedas nudda  
in sas carenas vocade sa thudda

Bois gigantes de su Monte Prama  
Chi mantesu bos ana sutta terra  
Nade de su cuntinu aferra aferra  
Chi nos an fattu sa zente de Zama  
De sa perdita prepotente brama  
Totu perdita in vana cundierra  
Contade bois ca n'amus bisonzu  
Pius de s'abba in s'aridu atonzu

Conta Nuraghe non ti firmes como  
De chie partid'est pro non torrare  
Shardana nados populu de mare  
Ch'in predas tuas fatu aian domo  
Sos chin terras d'egitu an tentomo  
Pro su corazu e su navigare  
S'istoria iscrie a totu nade

Nazes nos totu cussa beridade

Pro un sardu in bisita a sos nepodes in foras

Curvu a passu lentu e arrugadu  
Unu surrisu azinnadu appena  
in visita bennidu in terra anzena  
De carchi fizu in cue emigradu  
De dolore in sos ojos ses signadu  
E intro coro semper ti dat pena  
Ca non tenes vicinu sos afetos  
De fijos e nepodes prediletos

Su trattu sardu ti faghet ladinu  
D'umiles pannos netos ses vestidu  
Chircanne solu de no esser vidu  
Caminas semper in s'oru e caminu  
Pares ti cuves a carchi destinu  
Chi amicu non t'est e t'at feridu  
Ma pro afetu de chie as in coro  
Bi caminas chin isse a malucoro

Accumpanzas benignu chin s'ojada  
Nepodes tuos alligros currenne  
Como s'amore in coro est vinchenne  
Como non faghet de dolu giamada  
Ma est in coro ancora cuvada  
Sa ferta chi in coro t'it dolenne  
canno partinne l'ana' abandonadu  
e t'an privu de gaju meritadu

Dae sos vinchidores est iscrita

Dae sos vinchidores est iscrita  
S'istoria e in iscola istudiada  
Sa nostra a noi Sardos est negada  
nos an post'in sos ojos sa berrita  
Nos naran chi s'issoro est beneita  
E chi nois non n'amus de passada  
Solu s'issoro est digna d'ammentu  
Solu da issos ne amus cuntentu

Nos an contadu in sa limba issoro  
Chi fimos ruzu populu e pastores  
Non fimus de cultura portadores  
Ne in sas artes aimus su decoro  
Non connoschinne ne prata ne oro  
Nos an leadu cale servidores  
Chie ira no at e ne ammentu  
Ridotu est a isciau ed est cuntentu

Sardu si no as de isciau bocascione  
Chirca su tuo arrastu e raichina  
Non credas a s'italica dutrina  
Chi t'at mantesu liberu in prejone  
Si ticheres de populu nazione  
S'istoria tua mantene ladina  
De su chi fimus e non an cancelladu  
In core mente mantene assentadu

Nivanne

Falat su nie copertu est su campu  
Miro lontanu in chirca 'e ammentos  
Canno in cuvile tra focos e bentos  
A su fritore chircavas iscampu  
Framas de coro prus lestras de lampu  
Paren mutinne tra milli turmentos  
A babbu bio infustu e barbudu  
A curzu a mie daennemi azudu

Mama m'ammento fachenne su ocu  
Galu arveschenne in sa ziminera  
Astringhenne una vetza caffetera  
Mutinne a nois munnanne su locu  
Tanno a pitzinnu pariat ch'it jocu  
Come de totu b'at prus cunsidera  
Non b'iat luche ne abba currente  
Ma de afetu it prena sa zente

Parthinne dolos piant' e cuntentos  
S'istare bene e s'istare male  
A cunnimentu juchias su sale  
De cuddos naturale sentimentos  
Los muto como ma sun sol'ammentos  
Chi m'aperin su coro che istrale  
Finidu est de su mele sa dulcura  
Como son tempos bonos de tristura

Fimus e semus

Fimos iscurtos, chen'abba, famidos  
Chin d'un'aranzu nos acumentavan  
Casu chin pane a mannicu nos davan  
Vestidos chin istrayos rimunidos  
Mannos no semus fatos e creschidos  
Credenne a su chi totu nos naravan  
Como semus vestidos e cartados  
Chin pranzu e chena ma disinformados

Peppe Montesu

Fughit sa zente a flita isfortunada

Moghet sa zente a flita isfortunada  
Terras e mare chircan 'e secare  
Lacanas zumpen chene dimannare  
Prena de dolu derruta ispreada  
Onzi caminu e janna est serrada  
In sas de coro non poden intrare  
Sos chi los ponene in custu caminu  
Dezidin d'issos s'insoro destinu

Sos disinnos politicos marranos  
Chi los agganit in sa domo issoro  
Chin sas aturas privas de decoro  
Los atirat chin faghene rufianos  
Los faghet pius mannos rimitanos  
Senza li dare su chi ana in coro  
Viven pro garantire a sa finanza  
S'arichimentu chene male e panza

Chin su bisonzu sun'ammescurados  
ispuntillanne de pane onzi cantu  
tra afannos intintos de piantu  
a ispuntillu chi sos disocupados  
dae matzones mannos isfrutados  
chen'aer Deus e chen'aer santu  
privos de gaju chircanne fortuna  
chen'interessu e a sa jeuna

In custa cantonada

De pasu disizosu  
D'istajone coladas  
E de veranos chi non torran prusu  
Chene pache ne gosu  
Sas carres imbezadas  
S'istrada est vorriada a punt'e susu  
Times a la mirare  
Istracu de annare  
Arreas isetenne disillusu  
Timenne su benente  
Amaru chene gaju surridente

chircat galu sa mente  
De leare su bolu  
Ma non resessis a aperrer alas  
Pius non ses balente  
Afannu totu e dolu  
Sunu sos annos chi as in sas palas  
Totu pesan a tie  
Unu mese una die  
Sena sos pranos ti paren iscalas  
Cheret sa ment'annare  
Ma sas ancas non poden azudare

In dae secus torras  
De su tempus voladu  
Chircanne in issu ispera e azudu  
Sas visuras agorras  
Cuddas chi t'an marcadu  
Non ti faeddana e tue ses mudu  
In su mudore issoro  
Sos tocos de su coro  
Mutinne istan chene aer dudu  
T'azunghet totu dolu  
Sena s'amentu vatit disconsolu

Ma in ojos lu vies  
In s'ora ti allughet  
Chircas galu apozu a t' atacare  
No lu tenes non ries  
Sa visione rughet  
In disconsolu sichis a annare  
Ischis no b'at essida  
Goi est custa vida  
Su tempus nemos lu podet firmare  
Ammettanne e in pena  
Fizas chi lu permitit sa carena

In segretu a sa muda

No an pius rozeu sos sentidos  
Non bi tocheddan ne paren in pena  
Totu ligados a forte cadena  
istan serrados a fora no essin  
sa janna de zumpare non resessin  
paren in casciaforte custoidos

Bestidos de cumbeniu interessadu  
essin fingidos si b'at torracontu  
Neun'est in s'azudu lestr'e pruntu  
Totu lassamus atesu e luntanu  
In palas semper cuvamus sa manu  
E non torramus su chi nos an dadu

A bortas in cumbata chin s'istintu  
truncan de petus cuss' arta crejura  
tanno che vies s'issoro bellura  
chi a s'ateru coro dat cunfortu  
su chi pariat sepultadu e mortu  
essit a foras d'amore ses tintu

Si sa mente lis annat in abboju  
Ponen sas dudas a banna a un'ala  
Truncan chin forza donzi limba mala  
Vestinne de umanu onzi fatura  
Gai torrat ridente a sa natura  
E zessat de sa vida s'aforoju

Dan issos solos a bida sustentu  
Bono e malos pare eguales  
Babbos d'amore bonesas e males  
Dae s'anima umana partoridos  
Totu los sentin chen'esser vidos  
Odiu denne amore e cuntentu

S'est d'amore de forza est mesaggeru  
Semper ligadu est a sa cusenzia  
In so coro at postu permanenzia  
Ti dat belleza chene esser bidu  
Mudat abellit dae coro essidu  
Totu ti dat chene cunsideru

Ma si est odiosu dat rancore  
Ranchidu rennet su vivere umanu  
Dolore isparghet a sero e manzanu  
Luttos e dolos partorit cuntinu  
Li truncat a s'ispera su caminu  
Si no l'ucchide a corfos d'amore

Intenne

De custu coro su palpitu intenne  
S'oricra para no istes marrana  
A tie mutit ca li ses luntana  
Pares sos bios suos olvidenne

Est che marteddu sonanne campana  
Ma tue a sa mutida surda ses  
Ma pro dovere dare bila des  
Una risposta peri siat vana

Prite columba custu fagher feu  
Chi m'at in d'una tumba sepellidu  
In istadu dolente e avilidu  
Non das risposta a custu coro meu?

Isto chircanne a sucutos mudos

Isto chircanne a sucutos mudos  
Sa Sardigna perdida immentricada  
Totue pedo a umbe est annada  
Ma fizos suos, ispozados nudos  
No mi risponnen no mi dan'azudos  
Risposta a mie non benit torrada  
S'ormina e s'arrast' amus perdu  
De ateros sa via amus sichidu

Paret su nostru roba e infrunnire  
Su ch'est istranzu totu est preferidu  
Su fagher nostru no est preferidu  
Modas istranzas vamos a sichire  
Chene passadu annane a pedire  
Chene vrigonza e chene sentidu  
Che fozas dae ventu boliadas  
Chi nemos ischit a umbe sun boladas

Che barca dae undas athapada  
Semus sardos chircanne unu portu  
In disconsolu privo d'acunortu  
Totuve annanne chen'aere intrada  
Donzi cultura nostra est arrimada  
Privos d'una rejone sempre in tortu  
Si no torramus a sas raichinas  
S'ana a sicare de ramos sas chimas

Prima fis

Prima fis vrisca funtana  
D'abba cristallina e pura  
Como ses piscina iscura  
Bibidorju e carchi rana

Canno connotu t'aia  
Parias santa in capella  
Lughente fis che istella  
Piena fis d' allegria

Ti ses mustrada crudele  
Mi as a morte feridu  
Si jeo no lu ere vidu  
parias dulcura e mele

Su focu de Sant'Antoni

Sa die dechesette de jannarju  
Focos e framas in donzi contone  
Alluttos sunu pro devotzione  
Pro ammentare Antoni Porcarju  
Canno dae s'iferru lacanarju  
Ch'iat furadu unu lampajone  
a su munnu daenne dae s'ora  
Su focu alluttu in donzi dimora

Zente preghenne zirat a intunnu  
Ringrazienne su nobile santu  
Cun ballos tunnos e in sardu cantu  
Paret su focu su centru e su munnu  
De calore e de benes paret funnu  
Chi assutat lagimas e piantu  
Tanno cominzat su carrasecare  
In terra sarda isula in su mare

Peppe Montesu  
Jannarju 2017

De mama s'isguardu apo fissadu

De mama s'isguardu apo fissadu  
Iscolpidu lu tenzo in mente mia  
canno a iscola pro sa prima via  
a manu tenta m'at acumpanzadu  
como chi l'isco su ch'iat pensadu  
ne provo orgogliu chi narrer cheria  
fit d'una mama orgoliu pro fizu  
de su coro it in ojos su lampizu

fipo jeo su sole e crescher sou  
fip' intro coro sa sua aurora  
fipo sa vena chi neta donz'ora  
abba ti dat pro su sidu nou  
fipo su sou cherre fagher prou  
de mezeru de poghera dimora  
fipo jeo su chi non l'an dadu  
e totu cantu su chi l'an negadu

como solu cumpresu l'apo ebbia  
su cuvadu disizzu de su coro  
su sognu tou che nobile tesoro  
chi mai t'apo dadu mama mia  
ma mama azetta custa poesia  
chi mi est cara prus de prata e oro  
non t'apo dadu ne benes ne fama  
ma solu amore do a tie mama

Ite bella melodia

Ite bella melodia  
Custu vostru ciu ciu  
Su dolente coro miu  
Ponides in allegria

Rundines bene vennidas  
A s'amada primavera  
Sa nitid' istajone vera  
Sinzera de cuntentesa  
No mi vatides ofesa  
Ancora dazes consolu  
Solu briu e oriolu  
Batides bois ebbia

De consolu e de ispera  
Sezis a custas feridas  
In sas teulas crapidas  
Chircades de annidare  
Lizeras in su bolare  
Istades totu su die  
Cios faghides a mie  
Chin donosa cumpanzia

Amicas caras benide  
Su dolore ammodicade  
Su coro meu ischidade  
Prenademil'e amore  
Ca in iverru a dolore  
Lu apo totu perdidu  
Torrade a mi ponner sidu  
de amare atera via

a su solu coro meu  
cumpanzia li fachide

## Lampizos

Totue faco sa dimanna esatta  
nemos mi dat a custu consolu  
no mi ne dana e arreo in dolu  
pruite so inoghe nemos natta

mi pesso jeo risposta non b'ata  
Non b'at risposta a cust'oriolu  
Non bi arribat su pensieri solu  
Risposta mancu isse minne data

Su coro forzis ne at calicuna  
Canno sa mente non ti dat risposta  
Chircala intro d'isse s'as fortuna

S'oricra para aisse l'acosta  
Ass'a intenner tue tot'in d'una  
Chi ses inoghe ma est tot'a posta

Lenardu Alagon: sa batalla e Macumere  
Pro che cancellare s'ammentu de Carroz

Su deghe nove maju fit sa die  
De setantot mille batoschentos  
In Macumere de gherra fin bentos  
E Alagon Lenardu fiti inie  
Cumbatinne iscrittu an gasie  
Contro pretesas e traichimentos  
Chi cheriat torrare a s'Aragona  
sa d'Oristanu e Costera corona

Carroz chi de Lenardu it timorosu  
Vice re de su regnu e Aragonesu  
Li moghet gherra a Marghine atesu  
Ca isse de podere fit bramosu  
de Sardidade privu e ingannosu  
mudat s'istoria e secas de pesu  
sa sarda idea ch'enit a mancare  
ca cun iss' amus devidu gherrare

Chin Alagon iscumparit s'idea  
de Sardigna istadu indipendente  
sa libertade de sa sarda zente  
S'Aragona li torrat sa tropea  
Morit gasie sa nazione intrea  
sotumissa da unu prepotente  
non torrat sa Sardigna a palpitare  
tirados da ambas' alas de su mare

Peppe Montesu  
Santu Gavine 2014

No isco in foras ite jeo aspeto

No isco in foras ite jeo aspeto  
Chin s'intrighinu ch'iscurat s'aera  
Nues lontanias boidas d'ispera  
Bio in arrivu e solu las'iseto

Miro luntanu una caminera  
Intenno fritu e su focu apreto  
A sa ventana un'ojada gheto  
Sa luna puru est sola che fera

Brujat su focu e caentes fiamas  
S'arzan a chelu dae su fochile  
S'intennen foras dae su jannile  
Gridas de dolu lamentas e giamas

Non ghetto ojada e tanco sos ojos  
Mancu sas voches pius las intenno  
S'anima e coro in intro las prenno  
Cuvadu arreo in tantos tripojos

Non bi cantat....

Non bi cantat prus aes in s'aera  
Non murmutan funtanas e ne rios  
In sas domos non b'at pius ninnios  
Non bi at zente setida in carrera  
Non bi at fogu e nen ziminera  
Pius de zente no s'at ammùnios  
Nemos ammirat s'argentadu chelu  
Nemos suspirat nemos at anelu

Peppe Montesu  
Capidanne 2016

O verbu incarnadu in sinu de Maria  
dormi vida e coro riposa e ninnia

In sa paza bambinu  
a tie an caentadu  
in suferente istadu  
unu boe a vichinu  
chin d'un'ainu ebbia

in'istalla naschidu  
umile in povertade  
po dare libertade  
a donzi pessichidu  
in pena e tribulia

tres re de oriente  
si ponen in caminu  
in chirca e su bambinu  
una lughe potente  
li mustrvat sa via

solo: So re d'oriente cun grande decoro  
incensu mirra e oro a Gesù li donesi  
coro: evviva Maria e Maria viva  
evviva Mari e Maria viva

solo: Su riu Giordano Giuanne Battista  
cun sa sua manu a Gesù battizesi  
coro: evviva Maria e Maria viva  
evviva Mari e Maria viva.

S'universu

Sos sonos de s'aera  
In sas notes de luna  
Lepios che carignos sun a bolu  
Cun s'anima sinzera  
Chene duda peruna  
Mirat su firmamentu a mie solu  
E jeo miro a issu  
In ojos l'apo fissu  
E dolore no apo in coro o dolu  
M'est parenne maghia  
Ma mi paret mutinne a mie ebbia  
Lampizos de isteddos

Bagliores e iscueros  
Paren teatru de mann'autore  
Mannos e minoreddos  
Argentados e puros  
Riden cumpostos chen'aer colore  
Paren mutinne a mie  
Prima ch'arribet die  
Daenne lughe in cussu iscuricore  
Cun sos rajos narenne  
Sun de amore chi semus daenne

Infatu chin sa mente  
Leat bolu chin issos  
S'anima mia in chirca 'e consolu  
S'universu isplendente  
De chelu sos abissos  
Umbe est annane su meu oriolu  
In cue sunu totu  
Paret caminu notu  
Narenne beni inoghe lea bolu  
Sa morte no la timas  
Dulche la renne chin cantos e rimas

Sa ine

Cann'est drempida sa frutt'in su funnu  
A terra falat no arreat cue  
Gai carena mea falas tue  
E nemos prus ti zirat a intunnu  
Canno sicadu de vena est su bunnu  
amore chircas ma non b'at neddue  
nemos faghet a tie cumpanzia  
nemos ammentat su ch'is una bia.

Sa mezeria

Sas biddas nostras vennenne la sunu  
Pro unu soddu la sun regalenne  
E naran chi progressu sun fachenne  
E forzis beru est pro calicunu

Pro menzus faghene in donzi comunu  
Senna de moros no sun pienenne  
Abellu abellu no sun cambienne  
Sena s'aeddu e color' opportunu

A forza d'essere comente nos naran  
Non semus sardos comente'e a prima  
Ma' assimizamus a unu minestrone

Lassamus acher chene chistione  
Custos espertos de totu e de clima  
Chi fesserias cumpostas isparan.

Sa zente sas biddas est lassanne

Sa zente sas biddas est lassanne  
Ca sun' irboidadas de ispera  
Non bi torrat istiu e primavera  
S'iverru solu las est astraganne  
S'atonzu a issas paret atitanne  
In isetu e sa morte cudda vera  
Totu est in abandonu totu in lutu  
S'uju est de piantu puru asutu

Partidos si che sunu sos giovanos  
In terra anzena su pane chirchenne  
In piantu sas mamas pianghenne  
Pregan a Deus de los bier sanos  
Prantos de coro ammentos luntanos  
Che lanzas cussos coros sun punghenne  
Sa morte an'in disizu e in isetu  
Pro bier nessi su luntanu afetu

Domos tancadas boidos caminos  
Chin carchi faza trista in sa bentana  
Nemos nat nudda ne nudda lis nana  
Paren sinzados totu sos destinos  
Barbara zente crudeles cainos  
Sardigna mea distrutu ti ana  
In su piantu e in su dolore  
Ti an feridu e non tenes ardore

Bezza ses diventada chen'ardore  
Solu piantu bunnan sas funtanas  
Ponenne ifatu a sas promissas vanas  
Posta ti ses in afannu e dolore  
Ses in su campu che sicu fiore  
Sas bruturas sichinne Italianas  
Egau ifattu galu pones tue  
A sos chi nana e arrear'in cue

Non tenes ira non ses prus balente  
Pares runzinu bezu irdenticadu  
Ti an'ofesu brutada e domadu  
Bocannetiche murale chin dente  
Tue a su ladru de su continente  
In sas burras de lussu lu as corcadu  
Ti an postu sa sedda e sa letranca  
Non curre prus a destra e a manca



## Umbe ses Deus

Segundu sa dotrina elementare  
a sa domanda " inue abita Deus ,"  
rispondian" in chelu ,in terra e in mare "  
diversu est su pensamentu meu.

ca diversu est su logu 'e l'agatare:  
ue best' Isse bi es sempre sa lughe,  
ue est iscuru inutil'est chircare,  
issu non b'est si non b'at una rughe.

l'agatas ue b'est sa poveresa,  
l'agatas ue b'at tantu dolore;  
non bi est mai in mesu e sa ricchesa,  
non bi est mai inue non bat amore.

l'agatas caminende in su caminu,  
in umiles pannos de unu barbone,  
mort'e famene in su pellegrinu,  
in sa tristesa 'e chi est in presone.

in su poveru chi est disocupadu  
teninde tantos fizzos de campare,  
in su ezzu chi solu ch'est restadu,  
inie b'est e lu podes incontrare.

cand'in frabica 'es ruju de suore  
si estit s'oberaiu suffrinde  
issu est inie e non lu ses bidinde  
sullevande ogni pena cun amore

inue bi at belleza in dogni cosa,  
podes intender sa sua presenza,  
in sa delicadesa de una rosa  
o de su sole s'immensa potenzia.

non b'es de su piromanu in sa manu  
chi finas sas pedras alluttu ad in fogu,  
cambiende su buscu in d'unu logu,  
tristu,,,,,che restu de unu vulcanu.

non bi est in sa costa ismeraldina  
cal'hat su Deus dinari occupada,  
e s'anima 'e su riccu brusiada  
non bi est pius dimora genuina.

non b'est in sos chi meda ipocrisia,  
finas de incensu si profumana,  
nendedi frade e si poden ti allumana  
cun diabolicos fogos de malia.

non b'est in chie no hat pistighinzos  
c'at aburridu 'e fizzos sa naschida,  
operende tremendos aburtizos  
in dispreziu'e cantu cara es sa vida.

comente ides no est in tottue  
chi Deus odet fagher sa dimora,

perdona amigu si ti pedo in cust'ora  
si ti domando: ue lu chircas tue?????

GIOV. FRASSU de Ottana

Risposta de Peppe Montesu

Inumbe naras tue apo chircadu  
Ma de isse arrastu non b'aiat  
Solu dolor' e pena si vidiat  
Forzis in cue non bi est coladu

Intradu so in domo e povertade  
E m'an nadu chi mai bit coladu  
Si no de cussu dolorosu istadu  
apidu n'eret isse piedade

Coladu puru so in su caminu  
E su barbone apo dimannadu  
Si m'est ziradu mes'arrabiadu  
Pacu cuntentu e su tristu destinu

L'apo pedidu si at bidu a Deus  
surrisu m'at cun faghene amaru  
mi at nadu chi a isse mai imbaru  
l' at dadu e n'at rezidu male e peus

Unu disocupadu m'at contadu  
Chi a isse azudu iat pedidu  
Ma it morinne de gana e de sidu  
E traballu a isse no l'at dadu

Mi naras chi in fabrica l'as vidu  
umbe est calicunu sudorene  
ma non l'azudat e no l'est asutenne  
lu lassat a sa sola addoloridu

Chi non b'est in sa cost' ismeraldina  
mi naras tue e pares sicuru  
ma si benes dispensat isse puru  
penso cue at postu raighina

Ipocritas mi naras non bisitat  
Chi de incensu sunu profumados  
Ma paren sos solos fotrunados  
Chi chin su numen sou los istitat.

Naran non b'est in sos abortistas  
Ma su Papa at nadu diferente  
Nadu nos at chi cun cussa zente

B'arreat pro aperre noas pistas

Lu vies tu e chin sos bisonzos  
privos de alimentu derelittos  
ma si dimannas cussoss pogheritos  
diferente ti contan dolorosos

Lu ides in su sole e in sa rosa  
Lu ides solu tue solamente  
Canno ti faghet ischerzu sa mente  
E non cheres mirare vera cosa

Umbe cheres a Deus pones tue  
inumbe non cumbenit nollu cuas  
ma de intenner cumbenias tuas  
intesa non ne cheren prus neddue

Peppe Montesu

Deus si b'est chin tantu podere  
est azudanne sas concas mitradas  
cuddos chi gullin ricchasas furadas  
e cuddos chi de totu sunu meres

est un'imbrollu su chi contas tue  
pro zente ch'at in coro timoria  
est sa chi ti cont'opinione mia  
Deus si b'est non es certu in cue

## Sognos perdidos

Intro su riu los vio currenne  
Sos sognos mios de tempos annados  
Mancu sas abbas los ana bagnados  
Paren ancora a mie faeddenne

Nos as lassadu inoghe imbolados  
Disisperados a tie giamenne  
Ma tue ateras voches intennenne  
Nos as in modu feu abbandonados

Vies su curren tou ite t'at fatu  
Su chi as valanzad'a nos lassare  
E totu cantu su chi as perdidu

Cantu e coro dolore patidu  
Cantos impudos cantu lacrimare  
Ca non ses bennid'a nois ifattu

De su chi t'amus dadu ite n'as fatu  
Ite n'as fatu de cuddu volare  
Mira comente ti ses reduidu

Como su tempus dechidu est finidu  
Mancu s'ammentu consolat a tie  
Non pianghes non mutis non nos ries  
Prus non caentas su coro fritidu

Su mele chi aias l'as perdidu  
Che l'as leadu picadu a inie  
L'as dadu totu no ischis a chie  
Como t'abizas ch'it oro cannidu.

Sos cantos e rimas de como

Unu versu cantadu in sarda rima  
faeddat a su coro e ogni sardu  
paraulas de mannu riguardu  
non naran' oe su chi fimus prima

e nois a sa limba prestu o tardu  
torremas tottu a li ponner istima  
chircamus paris cambiamus clima  
iscagliamus d'orgogliu custu dardu

poesias e canticos de como  
paren contanne solu s'isventura  
de nois tottu su dolu e sa pena

faeddamus chin d'una limba anzena  
sempere inertos prenos de paura  
atthappados in mare senza domo

Contamus chin sa limba de sos babbos  
de sos pizinnos intro e sas chillias  
a umbe annavas da umbe venias  
cal'in so sos usos e cal'in sos grabbos

sas zimineras e lungas ninnias  
de duros dolos, carena e aggabbos  
de pogherittos de riccoss nababbos  
de sognos e de cosas chi cherias

torramus a sichire su caminu  
chi truncadu nos ana malamente  
chin mala fide e chin fagher reu

torramus prestu a parrere meu  
a faeddare in sardu chin sa zente  
pro cambiare su nostru destinu

Peppe Montesu

Sos novos pedidores

Prite pedis a mie  
Cussu chi tenes tue  
Chi non connosches ne cheres toccare  
Ca si lu do a tie  
Jeo in aterue  
Pustis lu devo annare a chircare  
A toccare su tuo  
Jeo cert t'azuo  
Ma lass'istare su limusinare  
Deus totu t'at dadu  
Cante a mie nudda t'at negadu

Computati su coro  
Impignala sa mente  
Comente fago inoche faghe in cue  
No est prata ne oro  
O su chi dat sa zente  
Su chi servit a tie juches tue  
Tue cussa richesa  
In intro tene presa  
In foras no l'acattas in neddue  
Dunca nudda non pedas  
De sas chi pedi richesas n'as medas

Lassa custu pedire  
Afrontala sa vida  
No istes menguante pedidore  
Sas dotes fach'essire  
Fachela s'atrivida  
De vivere de traballu e de sudore  
Vive de dignidade  
Pienu e libertade  
Zappalu e messa su tou laore  
Mannica de su tou  
De sas dotes chi as faghenne prou

Tue non se guastu  
As sas manos e mente  
No istes firmu a bonette in manu  
Balanzati su pastu  
Fieru e dignamente  
Lassal'istare custu viver vanu  
pedi pedi non bes  
ca che a mie ses  
abile e valorosu critianu  
fache comente a mie  
de sudore ifunnet'onzi die.

Su campu e batalla

Finida sa cumbatta, sos alenos,  
S'ispannan in s'aera chin furore  
Dae sas fertas non b' essit dolore  
Su samben cucuzadu at sos velenos  
De isse terra e rios sun pienes  
Senna sa morte aenn'est terrore  
De corpos semenadu su terrinu  
Pro certas concas pogheras de tinu.

Su pluri cundannadu trumbadore

Su pluri cundannadu trumbadore  
Narat chi un'anzone at adotadu  
Forzis cumbintu de esser votadu  
Dae vegnos de ruju colore  
Ma a s'ora de su botu cun dolore  
At'a cumprennere cantu l'est costadu  
Isce s'anzone lu at adotare  
Ma non b'at sardu chi l'at a votare

Privu e rispetu pro donzi pastore  
Chene rispetu e s'anzenu traballu  
Pro carchi votu isse dat avallu  
Vanificanne su sardu sudore  
Chin aturas de falsu e impostore  
Immentricu e rejone tot'irballu  
Meritat sa cundenna pius manna  
Nemos l'aperjat ventana ne janna

Trampa e tramperis

Tramperis totu ben'organizados  
Nos dan de poesia vallu e votu  
De s'amicu su versu tenen notu  
Chi tempus prima los at premiados

Versos no isco si sun copiados  
Ma sun poetas e giudices totu  
In premios infunnen su biscotu  
Cun versos letos pro cuss' arranzados

Issos si cantan si ballan e sonan  
Paren sos vates de sa sarda rima  
Prus de paones sas pumas mustranne

Sun sa vena poetica sicanne  
e chie l'amat che perdet s'istima  
Faghene dannu umbe issos colan.